

Dunnas tschentan la maioritad dal suveran grischun

L'Allianza dal Center (AdC) vul sco emprima partida dal Grischun nominar ina dunna per las elecziuns en la regenza da l'onn proxim. Las autras partidas han u renunzià da nominar ina dunna u anc betg nominà. La FMR ha dicurri cun Kathrin Räber-Schleiss, presidenta da la Centrala da dunnas dal Grischun.

Martin Gabriel/FMR

Probablamain saja da quintar che er la proxima regenza grischuna vegnia puspè dominada dals umens, ha Cathrin Räber – Schleiss ditg. Dasperas consisti la populaziun dal Grischun d'ina maioritad da dunnas. a basa da quella maioritad avessien las dunnas da tschentar pliras cusseglieras guvernativas.

FMR: Essas vus betg cuntenta uss che quai dat almain ina candidatura per la regenza il 2022?

Cathrin Räber-Schleiss: Segiramain sun jau cuntenta. Almain ina candidatura datti apparentamain. Las dunnas stuessan dentant exnum tschentar pliras candidatas.

Daco na vegn il criteri "dunna" betg resguardà pli consequentamain tar las nominaziuns?

Ord il pugn da vista da la Centrala da dunnas dal Grischun ha quai da far cun la pussanza masculina. Dapi 200 onns vegn la rait da contacts dals umens protegida dals umens. Las dunnas en exclusas e vegnan betg integradas. Las dunnas en las partidas èn quellas che fan la lavur gratuita da secretariat e che van sin via cun reclamas d'elecziuns e che mainan magari las partidas. Nominà per in post politic vegn lura dentant in um cun reputaziun ubain cun ina fatscha enconuschenta.

Fissi da stgaffir ina "quota" da dunnas per la regenza?

Jau persunalmain sun per ina tala soluziun cun ina quota da sezs per dunnas en la regenza. Senza ina tala quota duvrain nus anc almain 100 onns enfin che nus avain ina represchentanza commensurada tranter dunnas ed umens en la regenza e notabene er en auters gremis per exempel da l'economia dal Grischun. Jau crititgesch surtut, che nus avain quotas per dumondas da la represchentanza linguistica, geografica e per part anc confessiunala. Sulettamain per dunnas dastga quai dar nagina quota. Quai n'è betg fair ed jau na sai betg tge indizis che quai dat cunter ina ulteriura quota.

"Dapi 200 onns vegn la rait da contacts dals umens protegida dals umens".

Cathrin Räber-Schleiss, presidenta Centrala da dunnas dal Grischun

Tgè sa la centrala da dunnas far per promover anc pli fitg las dunnas en la politica?

En ils chanals che nus avain, pruvain nus da far lavur da motivaziun. E nus purtretain per exempel tuttas dunnas che candideschan per il cussegl grond e nus publitgain quests purtrets. Ed avant las elecziuns daventain nus er activas tar las electuras e tar ils electurs. Sco quai che nus avain observà a chaschun da las davosas elecziuns èn ils success electorals da las dunnas pli gronds che quels dals umens. La centrala da dunnas sustegn natiralmain tut las dunnas e naginas partidas perquai che nus essan ina instituziun neutrala.

La nua che naginas dunnas candideschan, datti dentant nagins success per dunnas?

Jau sai che jau sa stend fitg or da fanestra cun dir che ina partida che porta in summa naginas dunnas sco candidatas è nunelegibla per mai. Jau manegel che quai vala per tut ils gremis politics e na betg per la regenza. Da nominar candidatas e candidats domaduas schlattainas tutga tar il bun stil ozendi.

Per blers stat be la dumonda da la qualificaziun en il center. Ins auda savens er igl argument che quai tuttina sche um u dunna: Impurtanta saja la qualificaziun. In argument impurtant, u betg?

Gie, cler. Qua sun jau er persuerter. Lura giavischass jau dentant che la dumonda da la qualificaziun vegness er fatga consequentamain tar ils umens e betg sulettamain tar las dunnas. Tar ils umens è quella dumonda da secunda impurtanza. Tar la dunna che candidescha guard ils l'emprim sin la qualificaziun. Dasperas pudain nus constatar che la maioritad da las persunas che termineschan in studi èn dunnas. Per saldo po quai tuttina buca esser che dunnas n'èn betg qualificadas.

Las partidas promovon memia pauc activamain e cun persvasiun las dunnas che vulan ir en la politica

Cathrin Räber-Schleiss, presidenta Centrala da dunnas dal Grischun

La cultura da promover las dunnas è en tuttas partidas in pau differenta. Tge concretamain renfatschais vus a las partidas?

Mia critica a tut las partidas è ch'ellas promovon memia pauc activamain las dunnas. Ord mia experientscha vegnan las dunnas giuvnas che vulessan ir en la politica betg promovidas cun passiun e cunzunt cun persvasiun. Cur ch'ins tshertga lura candidatas e candidats, dumonda ins insacura lur anc ina dunna. Tgei che nus sco Centrala da dunnas vulain far anc pli activamain è da crear raits da contacts per dunnas, e quai tant en la politica sco era en l'economia.